

Victor Gélou

Nouvè Grané



C.I.E.L. d'Oc

Centre International de l'Écrit en Langue d'Oc

3 Place Joffre, 13130 Berre L'Étang

<http://www.lpl.univ-aix.fr/ciel/>

NOUVE GRANE

PEYSAN DÉ VITROLO

A l'Espousicien universèlo dé Paris, en 1855.

LOU RETOUR

Bounjou, moun paire! Bounjou, ma maire! Bounjou, ma bravo Miano!... Moun beou Louisé, moun gro Glooudoun, ma gento Rouseto, mei trei beis angi boufareou!... Venè, qué vous embrassi toutei! E qué vous esquichi fouar!... Enca un coou!... Enca uno babo!... E pui mai!... Despui quatre lon mes qué vous avieou plu vi!... Enfin es dé retour lou peysan dé Vitrolo!... A retrouva la sousto dé soun paoure masagi; a remé la man su lou beou miou dei tresor; é vou quitara jamai plu!...

Ma boueno Miano!... ti languissies dé mi veire!... As agu poou, pa vrai?... Té! fai n'en ta fé, moun enfan: ti sies dégudo dire proun souven: mai Nouvè! en qué penso dé tan resta!... Reven plu!... L'a mai dé cin semano qué nous a gé douna dé sei novèlo!... En qué s'apren aco d'aqui!... Qu souu cé qué fa aquel ome aperamoun!... Es pa enca trouu viei, Nouvè: prendra sei trento sèt an ei carèno venen... Es un pouli troué dé mascle, surtou quan es aperi un paou sanjouria!... Dien qu'à Paris lei dalicado doou gro pessu, aquelei qué si pignoun pa eme un teoule, an agu souven endemia eme dé pu marris eissarri!... D'un aoutre caire, senso estre un coucho coutioun, Nouvè poou trebuqua coumo tan d'aoutre; un mouceou requis lou poou fa grouman!... S'avié fa pacho eme quaouquo bèlo damo é qué m'oublidesse!... E sé pui tamben venie à mi prendre lou ti!... Dieou mi san-preserve d'un malur parié!...